

Ես իսկոյն յիշեցի պառաւ Սուսանի մի օր առաջ յայտնոյիլը Այգեստանի փողոցներում եւ Հիւբբի կախարդական գաւազանի մէջ թաքցրած խորհրդաւոր թուղթը:

– Ուրեմն դու ինձանից առաջ գիտէիր, որ մատնուած ես, – ասաց տիկինը, – ուրեմն ես մի մեծ ծառայութիւն չարեցի քեզ, ցոյց տալով փաշայի ստացած նամակը:

– Դու ինձ շատ պարտաւորեցիր, – պատասխանեց Ասլանը:

Տիկինը ժպտաց:

– Բայց ինձ զարմացնում է, – հարցրեց նա, – թէ ինչպէ՞ս կարող էին քո նամակագրին յայտնի լինել այդ բոլոր մանրամասնութիւնները, որպէս պատմեցիր, – թէ՛ Ֆարհատի եւ Մարօի գիշերային խօսակցութիւնը իրանց վրանի հանդէպ, թէ՛ Խաթունի լսելը եւ նրա խոստովանութիւնը տեր Թողիկին, թէ՛ այդ քահանայի եւ նրա համախոհների արած մատնութիւնը քուրդ բեկին, եւ այլն:

– Այդ բոլորը յայտնել էր իմ նամակագրին Մարօն, – պատասխանեց Ասլանը: – Երբ տեր Թողիկը իր մօտ խորհուրդ է կազմում Կարապետ հայր սուրբի, տանուտեր Պետրոսի եւ քուրդ բեկի հետ, նրանց բոլոր խօսակցութիւնը լսում է քահանայի դուստրը, Սօնան, որը մի պատուական աղջիկ է: Նա շտապում է եւ շուտով իմացում է տալիս Մարօին, իսկ Մարօն՝ իմ թղթակցին: – Տեսնո՞ւմ ես, տիկին, դարձեալ կանայք են շինում բանը:

– Իսկ պառաւ Խաթունի խոստովանութիւնը քահանայի՞ն:

– Նա ինքն է պատմում Մարօին, երբ Մարօն հարցնում է նրանից: Ինձ գրել էին, թէ խեղճ պառաւը միշտ լաց է լինում, որ իր խոստովանութիւնը այդպիսի վատ հետեւանք ունեցաւ:

– Մարօ՛ եւ Սօնա, – կրկնեց տիկինը մի առանձին ոգեւորութեամբ, – երկու նորընծայ օրհորդներ, որ պատրաստում են ծառայել բարի գործին: Ա՛խ, որքան ցանկանում եմ գոնէ մի անգամ տեսնել նրանց:

– Երկուսն էլ շատ սիրուն եւ հարուստ ձիրքերով աղջիկներ են, – ասաց Ասլանը: – Ժամանակով նրանցից լաւ բան կդուրս գա...

Ա՛խ, որքա՛ն քաղցր էր ինձ լսել այսպիսի գովասանքներ թէ՛ Մարօի եւ թէ՛ Սօնայի մասին, երկուսն էլ անմոռանալի յիշատակներով կապուած էին իմ սրտի հետ...

Խօսակցութիւնը կրկին դարձաւ մատնութեան վրայ: Տիկինը հարցրեց.